



REPUBLIKA E KOSOVËS - REPUBLIKA KOSOVO
KOMUNA E VUSHTRRISE-OPSTINA VUCITRN

01 Nr. / Br 47/23

Nr. i fq. / Br. st -5-

Data / Datum: 23.02.2023

VUSHTRRI - VUCITRN



**REPUBLIKA E KOSOVËS
KUVENDI I KOMUNËS - VUSHTRRI**

**RREGULLORE
(KKV) NR.01/2023 PËR NDARJEN E BURSIVE PËR NXËNËS,
STUDENTË DHE SHPËRBLIMEVE PËR NXËNËS, STUDENTË TË
KOMUNËS SË VUSHTRRISE**

Shkurt, 2023

Bazuar në nenin 12, paragrafi 2, pika 'c', në lidhje me nenin 1.7 pika "s" të Ligjit Nr.03/1-40 për Vetëqeverisje Lokale, dhe nenit 19, paragrafi 1, pika 1.3 të Statutit të Komunës, Kuvendi i Komunës së Vushtrrisë në mbledhjen e mbajtur më **23 shkurt 2023** miraton këtë:

**RREGULLORE
PËR NDARJEN E BURSIVE PËR NXËNËS, STUDENTË, DHE SHPËRBLIMEVE
PËR NXËNËS, STUDENTË TË KOMUNËS SË VUSHTRRISË**

DISPOZITAT E PËRGJITHSHME

**Neni 1
Qëllimi**

Me këtë rregullore themelohet baza juridike për ndarjen e bursave dhe shpërblimeve për nxënës dhe studentë, banorë të Komunës së Vushtrrisë.

**Neni 2
Fushëveprimi**

Kjo rregullore përcakton raportet juridike të ndarjes së bursave dhe shpërblimeve në mes të nxënësve, studentëve të Komunës së Vushtrrisë.

**Neni 3
Përkufizimet**

Përkufizimet në këtë rregullore kanë këtë kuptim:

1. Bursë - është pagesë pa kthim e parave që jepet për të mbështetur arsimimin e nxënësve dhe studentëve, në bazë të arritjeve të tyre mësimore dhe akademike.
2. Shpërblim - është pagesë pa kthim e parave që i jepet nxënësit dhe studentit, i cili ka arritur rezultate të larta në fushën e dijes, shkencës, gara komunale, regjionale dhe ndërkombëtare.
3. Nxënës - një person i cili i ndjek mësimet në institucionet arsimore të arsimit parauniversitar (fillor, i mesëm i ulët, i mesëm i lartë).
4. Student - është një person i cili studion në një institucion të arsimit të lartë, kolegji apo universitet.

Neni 4 Bursat

1. Bursa u jepen nxënësve të arsimit parauniversitar për një vit shkollor, si dhe studentëve për një vit akademik të studimeve.
2. Përfitues të bursave janë nxënësit, si dhe studentët e nivelit bachelor, master dhe PhD, banorë të Komunës së Vushtrisë që studiojnë brenda dhe jashtë vendit.
3. Bursa mund të përfitojnë vetëm studentët që nuk janë përfitues të bursës apo pagës, nga institucione tjera që financohen nga buxheti i Kosovës.
4. Drejtoria përkatëse i propozon Kryetarit të komunës numrin e bursave për nxënës/studentë, shumën e parave për një bursë, profilet arsimore dhe fushat e studimit për të cilat ndahen bursat, sipas planifikimit buxhetor.
5. Drejtoria e Arsimit ju jep përparësi drejtimeve deficitare, në profilet arsimore që përfitojnë bursë.
6. Drejtoria përkatëse përcakton fillimin e vitit shkollor/akademik të dhënies së bursës.

Neni 5 Shpallja e konkursit për bursa

Drejtoria përkatëse i zhvillon procedurat për shpallje të konkursit për bursa, pas nxjerrjes së vendimit nga Kryetari i komunës, në harmoni me dispozitat e kësaj rregulloreje.

Neni 6 Kriteret vlerësuese për ndarje të bursave

1. Kriter për vlerësim të ndarjes së bursave merret nota mesatare, me përparësi nga nota më e lartë.
2. Në kushte të njëjta të notës mesatare, përparësi u jepet nxënësve dhe studentëve me gjendje të rëndë sociale, të cilat janë:
 - 2.1. fëmijë të dëshmorëve;
 - 2.2. fëmijë të martirëve;
 - 2.3. fëmijë të invalidëve;
 - 2.4. fëmijë të veteranëve;
 - 2.5. fëmijë të ish të burgosurve politikë;
 - 2.6. fëmijë të familjeve me asistencë sociale;
 - 2.7. fëmijë pa njërin, apo të dy prindërit.

Neni 7
Dokumentet e nevojshme për konkurrim

1. Dokumente të nevojshme që kërkohen për të garuar për bursë janë:
 - 1.1. dëshmia e regjistrimit të klasës/vitit të studimeve me certifikatën e provimeve;
 - 1.2. dëshmia se është banor i Komunës së Vushtrrisë;
 - 1.3. dëshmia se nuk merr bursë apo pagë nga buxheti i Kosovës;
 - 1.4. dëshmia se është fëmijë i dëshmorit, martirit, invalidit të Luftës të UÇK-së, veteranit të Luftës së UÇK-së, ish të burgosurit politik, dhe se është nga familja me gjendje të rëndë ekonomike-sociale.

Neni 8
Komisioni për ndarjen e bursave

1. Kryetari i komunës nxjerr vendim për emërimin e komisionit treanëtarësh (3) me mandat njëvjeçar (për vitin shkollor/akademik) për ndarje të bursave.
2. Kryetari dhe një anëtar i komisionit duhet të jenë zyrtarë nga Drejtoria e Arsimit, ndërsa anëtari i tretë një jurist me përvojë nga administrata e komunës.

Neni 9
Detyrat e komisionit

1. Komisioni mblidhet me ftesën e kryetarit të komisionit, më së largu pesë (5) ditë nga mbyllja e konkursit.
2. Kandidatët që nuk i plotësojnë kushtet e kërkuara sipas konkursit, eliminohen nga gara.
3. Përzgjedhja e kandidatëve bëhet sipas dispozitave të kësaj rregulloreje.
4. Pas përfundimit të përzgjedhjes, jo më larg se pesë (5) ditë nga dita e mbledhjes, komisioni i publikon rezultatet në tabelën e publikimeve, në web-faqe të komunës.

Neni 10
Komisioni i ankesave

1. Kryetari i komunës nxjerr vendim për emërimin e komisionit ad-hoc treanëtarësh me mandat njëvjeçar (për vitin shkollor/akademik) për shqyrtimin e ankesave, i cili vendim publikohet të web-faqe të komunës dhe në tabelë të shpalljeve.
2. Anëtarët e emëruar të komisionit janë nga radhët e zyrtarëve të administratës së komunës (me përvojë), nga të cilët një jurist, një zyrtar nga Drejtoria e Arsimit, dhe i treti po ashtu nga administrata.

3. Anëtarë të komisionit të ankesave, nuk mund të jenë anëtarët e komisionit që kanë marrë pjesë në ndarjen e bursave.

4. Komisioni është autoritet vendimmarrës, përfundimtar i çështjes, ndërsa vendimet i merr me shumicën e votave të anëtarëve.

5. Vendimet në emër të komisionit i nënshkruan kryetari i komisionit në katër fleta origjinale, të cilat ju dërgohen nga një: Kryetarit të komunës, komisionit për ndarje të bursave, palës që është ankuar dhe arkivit të komunës.

Neni 11 Procedurat e ankesave

1. Afati për ankesa është 8 ditë nga dita e shpalljes së rezultateve për përfitues të bursave.

2. Çdo kandidat i pakënaqur me rezultatin e komisionit për ndarje të bursave, gëzon të drejtën e ankesës tek komisioni i ankesave, sipas pikës 1 të këtij neni.

3. Pas kalimit të afatit për ankesa, drejtori i arsimit e nënshkruan kontratën me ta.

Neni 12 Obligimet kontraktuale

1. Kontrata nuk e obligon komunën t'i punësojë përfituesit e bursave pas mbarimit të shkollimit - studimeve të tyre.

2. Kontrata nuk obligon përfituesit e bursave t'i kthejnë paratë Komunës së Vushtrrisë.

3. Kontrata obligon përfituesit e bursave t'i përgjigjen DA-së, sa herë që DA-ja kërkon dokumente që përcjellin nivelin, vijueshmërinë dhe cilësinë e mësimave - studimeve.

Neni 13 Shpërblimet

1. Përfitues të shpërblimeve janë: nxënësit të cilët arrijnë rezultate të larta në fushën e dijës, teste të arritshmërisë, test të maturës, si dhe gara të ndryshme që i organizon Drejtoria e Arsimit.

2. Nxënësit dhe studentët të cilët arrijnë rezultate në gara regjionale dhe ndërkombëtare.

Neni 14 Shpërblimet e nxënësve dhe studentëve

1. Shpërblime u jepen nxënësve të cilët tregojnë rezultate të larta në mësim, teste të arritshmërisë, maturës, gara komunale dhe ndërkombëtare, si dhe studentëve të cilët tregojnë rezultate në gara ndërkombëtare.

2. Drejtoria e Arsimit, cakton lëndët garuese, klasat, kohën dhe vendin e mbajtjes së garave, si dhe ekipin komunal të mësimdhënësve, i cili i përgatit dhe i udhëheq garat komunale.

3. Nxënësi i cili në gara individuale, si dhe në ekip zë njërin nga tri vendet e para (vendi i parë, vendi i dytë dhe vendi i tretë). Për tri vendet e para (vendi i parë, vendi i dytë dhe vendi i tretë) nderohet me mirënjohje dhe shpërblim, me një shumë motivuese të parave që e cakton Kryetari i komunës.

4. Nxënësi me arritje të larta në mësim në nivel komune (nxënësi më i suksesshëm në komunë) nderohet me mirënjohje, si dhe shpërblehet me një shumë motivuese të parave që i cakton Kryetari i komunës, ose me disa ditë pushim në bregdet / turizëm malor.

5. Drejtoria e Arsimit siguron transportin, ushqimin dhe pijet për nxënësit dhe mësimdhënësit të cilët marrin pjesë në gara.

Neni 15 Garat e shkathtësive

1. Garat komunale të shkathtësive në sport, muzikë, art dhe fusha të tjera, mund të organizohen nga komuna sipas Planit të punës të Drejtorisë së Arsimit.

2. Shpërblimet për gara të shkathtësive janë si në nenin 14, pika 3 dhe 4 të kësaj rregulloreje.

Neni 16 Dispozitat kalimtare dhe shfuqizuese

Me hyrjen në fuqi të kësaj rregulloreje, shfuqizohet Rregullorja për Ndarjen e Bursave dhe Shpërblimeve për Nxënës të Komunës së Vushtrrisë, 01 Nr. 95/20, datë 28.5.2020.

Neni 17 Hyrja në fuqi

Kjo rregullore hyn në fuqi pesëmbëdhjete (15) ditë pas regjistrimit në Zyrën e Protokollit të Ministrisë për Administrimin e Pushtetit Lokal, si dhe shtatë (7) ditë pas publikimit në faqen zyrtare të Komunës së Vushtrrisë.

Melihate Basholli-Latifi



Kryesuese e Kuvendit